

Fieste de Patrie dal Friûl 2022: publicât il bant de ARLeF

I fonts a son di 35 mil euros. A son destinâts ai ents locâi furlans des regjons Friûl – VJ e Venit che a vuelin valorizâ la lenghe, la storie e la culture furlane in ocasion dai 3 di Avrîl

E sarâ Vît, tal Friûl occidentâl, a dâ acet ae Fieste de Patrie dal Friûl dal 2022: l'event che ogni an e ricuarde la date di costituzion dal Stât patriarcjâl furlan, ai 3 di Avrîl dal 1077. Ancje pe edizion numar 45, la Agenzie Regjonâl pe Lenghe Furlane - ARLeF e à publicât un bant par sostignî lis manifestazions culturâls realizadis dai ents locâi che a insiorin il calendari colaterâl ae "Fieste". A son a disposizion 35 mil euros.

A podaran acedi ai fonts i ents cun sede legâl intai territoris des ex provinciis di Gurize, Pordenon e Udin, ma - tant che pe edizion passade - ancje i Comuns furlans dal Venit (Cint, Concuardie, Fossalte, Gruâr, Puart, San Michêl dal Tiliment, Tei) in graciis di un acuardi tra lis Regjons Friûl-V.J. e Venit de fin dal 2020.

Daûr di ce che al previôt il bant, disponibil su www.arlef.it te sezion "[Bants, garis e avîs](#)", a saran finanziadis lis ativitâts che a vuelin valorizâ lis origjins, la culture e la storie di autonomie dal popul furlan. In particolâr: events di cualitât, di realizâ ancje online, che a rivin a fâ partecipâ soledut lis gjenerazions plui zovinis e che a sedin indreçâts a fâ cognossi e/o aprofondî la lenghe, la storie e la culture furlane; ma ancje stampe e difusion di publicazions che a vedin il stes obietîf; infin realizazion e instalazion di lastris, targhis o insegnis turisticis cul fin di memoreâ personalitâts che a àn contribuît in maniere impuartante ae conservazion e al disvilup de identitât furlane.

Lis ativitâts culturâls a podaran jessi realizadis di un ent locâl singul o pûr di agregazions. **Lis domandis a varan di rivâ dentri dai 21 di Març dal 2022**, dome midiant di PEC ae direzion: arlef@certgov.fvg.it.

Par dutis lis informazions sul bant, si pues telefonâ al 0432 555910, o scrivi a: federica.delpino@regione.fvg.it.

Udin, ai 2 di Març dal 2022

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<